

आकाशवाणी जयपुर—अजमेर  
प्रादेशिक समाचार

दिनांक 04.09.2024

समय: 18.45 बजे

- राज्य रा पुलिस महकमा मांय न्यारी—न्यारी भर्तियां मांय महिलावां ने 33 फीसदी आरक्षण रो प्रावधान करी ज्यो—राज्य कैबिनेट री मीटिंग मांय केई खास फैसला करी ज्या ।
- जोधपुर अर उदयपुर संभाग मांय भारी बारिश—जोधपुर—जैसलमेर रेलवे लेण ने नुकसाण व्हयो—केई बंधां ऊं बत्तो पाणी निकाळ्यो जा रह्यो है ।
- राष्ट्रपति द्रौपदी मुर्मू काल शिक्षक दिवस रे मौके 82 शिक्षकां रो मान करेला—राजस्थान रा दो शिक्षक ई शामिल ।
- राष्ट्रीय स्वास्थ्य मिशन री चौथी रीजनल कॉन्फ्रेंस आज जोधपुर मांय सरू व्ही ।

000

राज्य रा पुलिस महकमा मांय न्यारी—न्यारी भर्तियां मांय महिलावां ने 33 फीसदी आरक्षण दियो जावेला । ई सारू कैबिनेट राजस्थान पुलिस अधीनस्थ सेवा नियम 1989 मांय बदलाव करण री मंजूरी दे दीनी है । मुख्यमंत्री भजन लाल शर्मा री सदरत मांय आज जयपुर मांय व्ही कैबिनेट री मीटिंग मांय ओ फैसलो करी ज्यो । मीटिंग पाछे उप मुख्यमंत्री प्रेम चंद बैरवा अर संसदीय कार्य मंत्री जोगाराम पटेल खबरनवीसां ने मीटिंग मांय करी ज्या न्यारा—न्यारा फैसलां री जाणकारी दीनी । बैरवा कह्यो के महिलावां ने पुलिस री नौकरी मांय 33 फीसदी आरक्षण देवणो महिलावां ने मजबूत बणावण री दिशा मांय मोटो कदम है ।

.....  
उपमुख्यमंत्री बैरवा बतायो के राज्य सरकार रा कर्मचारियां रा रिटायरमेंट ऊं जुड्या नियमां मांय ई बदलाव कर्यो जावेला । मंत्री जोगाराम पटेल बतायो के सरकार भाजपा रा संकल्प पत्र मांय करी

ज्या वायदा धीरे-धीरे पूरा कर रही है। वे बतायो के प्रदेश ने बिजली बणावण रा मामला मांय खुद रे पाण ऊबो करण सारु कैबिनेट सूरज री रोशनी ऊं 3 हजार 150 मेगावाट बिजली बणावण री परियोजनावां सारु जमीन आवंटन री मंजूरी ई दे दीनी।

000

राज्य रा न्यारा-न्यारा हलकां मांय व्हे रही ज़बरदस्त बिरखा ऊं जिंदगी माथे घणो असर पड्यो है। जोधपुर अर उदयपुर संभाग मांय लारला दो दिन ऊं व्हे रही जबरदस्त बिरखा ऊं हालात बेकाबू व्हेवण लाग्या है। जोधपुर मांय व्हे रही भारी बारिश ऊं चामुंडा नदी मांय पाणी उफण रह्यो है। जोधपुर-जैसलमेर बीचे **जोधपुर ग्रामीण** जिला रा तिवरी अर मांडियाई कने रेलवे लेण हेटे ऊं मिट्टी बह जावण रे कारण पटरियां ने नुकसाण व्ह्यो है। ई कारण पांच रेल गाड़ियां रद्द कर दीरीजी है जद के कुछ गाड़ियां आंशिक तरीका ऊं रद्द करी ज्यी है अर कुछ गाड़ियां दूजा गेला ऊं चलायी जा रही है। जोधपुर शहर मांय ई मूसलाधार बारिश रे कारण नीचला हलकां मांय पाणी भर ग्यो है। **बाड़मेर** मांय आज लगातार दूजा दिन व्ही जोरदार बिरखा ऊं नीचला हलकां मांय पाणी भर ग्यो।

**बालोतरा** जिला रा सिवाना अर सिणधरी मांय ई जोरदार मेह बरस्यो। उदयपुर संभाग मांय ई व्हे रही तेज बिरखा ऊं आवण-जावण माथे असर पड्यो है। उदयपुर-अहमदाबाद नेशनल हाईवे माथे आज गाड़ियां री लम्बी लेणां लाग ग्यी। तीन दिन ऊं लगातार व्हे रही बरसात रे कारण उदयपुर मांय स्वरूपसागर अर उदयसागर रा दरुजा खोल र बत्तो पाणी निकाळ्यो जा रह्यो है। बांसवाड़ा रा माही बजाज सागर बंधा ऊं ई काल ऊं ही पाणी निकाळ्यो जा रह्यो है। धौलपुर जिला रा पार्वती बंधा रा ई 2 दरुजा खोल र बत्तो पाणी निकाळ्यो जा रह्यो है। **चित्तौड़गढ़** जिला रा गंभीरी बांध रा ई चार दरुजा खोल र बत्तो पाणी निकाळ्यो जा रह्यो है अर ई माथे करीब डोढ़ फीट री चादर चाल रही है। जल संसाधन विभाग जनता ऊं गंभीरी नदी रा किनारां ऊं दूर रहवण री अपील कीनी है। टोंक अर बूंदी समेत केई जिलां मांय नदियां मांय पाणी रो लेवल लगातार बध रह्यो है। राजधानी जयपुर रा केई हलकां मांय ई आज बिरखा व्ही। सीकर मांय 36 घंटा ऊं रूक-रूक र व्हे रही

बिरखा रे कारण जिन्दगी माथे असर पड्यो है। सांचौर जिला मांय चितलवाना कने शिवपुरा मांय लूणी नदी मांय फंसी भैंस निकाळबा सारू उतर्यो एक जणो बह ग्यो, जिण री एसडीआरएफ टीम तलाश कर रही है। मौसम केंद्र जयपुर रा निदेशक राधेश्याम शर्मा बतायो के आज जोधपुर, उदयपुर, कोटा अर अजमेर संभाग मांय कठे-कठे ज़ोरदार तो कठे-कठे घणी ज़ोरदार बिरखा रा आसार है। जयपुर, भरतपुर अर बीकानेर संभाग रा कुछ हलकां मांय ई बिरखा री संभावना है। वे बतायो के प्रदेश रा घणखर हलकां मांय आवता चार-पांच दिन चौमासा री बिरखा चालती रेहवण रा आसार है।

000

ओ पोर्टल न्यारी-न्यारी सेवावां सारू नोटरी अर सरकार बीचे संपर्क है, ज्यीं माथे ऑनलाइन तरीका ऊं अर्जियां दी जा सके है। डिजिलॉकर खातां ऊं डिजिटल तरीका ऊं सही करी ज्या प्रैक्टिस सर्टिफिकेट डाउनलोड कर्या जा सके है।

000

शिक्षक दिवस रे मौके काल राष्ट्रपति द्रौपदी मुर्मू देश रा 82 शिक्षकां रो राष्ट्रीय शिक्षक पुरस्कार दे र मान करेला। आं मांय श्रीगंगानगर रा डॉ. बलजिंदर सिंह बराड़ अर बीकानेर रा हुकम चंद चौधरी ई शामिल है। प्रदेश मांय ई शिक्षकां रा मान मांय न्यारा-न्यारा कार्यक्रम राख्या जावेला। जयपुर मांय राख्या जावण वाळा राज्य स्तर रा मान जळसा मांय मुख्यमंत्री भजन लाल शर्मा खास पावणा रा तौर ऊं सिरकत करेला। शिक्षा मंत्री मदन दिलावर री सदरत मांय व्हेवण वाळा ई जळसा मांय चुणी ज्या शिक्षकां रो मान कर्यो जावेला अर विद्यार्थियां ने टेबलेट दिया जावेला। राज्यपाल हरिभाऊ किशनराव बागड़े पैली वाळा राष्ट्रपति अर महान शिक्षक अर विचारक डॉ. सर्वपल्ली राधाकृ

षणन ने याद करता थकां कह्यो के शिक्षक शिक्षा देवण सागे विद्यार्थी रो जीवन गढे है। वे शिक्षकां ऊं विद्यार्थियां रो दिमागी बूतो बधावण, चरित्र बणावण अर देश भक्ति रा संस्कार वाळी सीख देवण री अपील कीनी। मुख्यमंत्री भजनलाल शर्मा ई शिक्षक दिवस रे मौके शिक्षकां ने शुभकामनावां दीनी है। वे नौजवानां ऊं गुरुजनां रा प्रति श्रद्धा राखण अर वां रो मान करण री महान परंपरा ने और मजबूत बणावण री अपील कीनी। विधानसभा अध्यक्ष वासुदेव देवनानी ई शिक्षक दिवस रे मौके शिक्षकां ऊं तनाव मुक्त, नशा मुक्त अर नारी रा प्रति मान रा संस्कारां री सीख दे र नौजवानां ने आदर्श जीवन रो गेलो बतावण री अपील कीनी।

000

राष्ट्रीय स्वास्थ्य मिशन री चौथी रीजनल कॉन्फ्रेंस आज जोधपुर मांय सुरू व्ही। इण मांय सात राज्यां अर केन्द्र रा राज वाळा तीन प्रदेशां रा नुमाइन्दा सिरकत कर रह्या है। चिकित्सा अर स्वास्थ्य विभाग री अतिरिक्त मुख्य सचिव शुभ्रा सिंह बतायो के देशभर मांय निचला स्तर तांई चिकित्सा तंत्र ने मजबूत बणायो जा रह्यो है। स्वास्थ्य मंत्रालय री अतिरिक्त सचिव अर मिशन निदेशक आराधना पटनायक कह्यो के आवता दो साल मांय देशभर मांय 1 लाख 73 हजार ऊं बत्ता आयुष्मान आरोग्य मंदिर काम करण लागेला।

000

चिकित्सा अर स्वास्थ्य विभाग महिला स्वास्थ्य कार्यकर्ता रा 3 हजार 671 ओहदां माथे अंतिम वरीयता सूची जारी कर दीनी है। विभाग री अतिरिक्त मुख्य सचिव शुभ्रा सिंह बतायो के महिला स्वास्थ्य कार्यकर्ता रा 4 हजार 847 ओहदा माथे भर्ती करी जावेला। 1 हजार 176 ओहदां माथे चुणी ज्या उम्मीदवारां रा प्रमाण पत्रां रो सत्यापन कर्यो जा रह्यो है।

000

हनुमानगढ़ जिला री भादरा नगरपालिका रा अध्यक्ष ओहदा सारू व्ह्या उप चुणाव मांय कांग्रेस-माकपा गठजोड़ री उम्मीदवार मुस्कान बानो चुणी ज्यी है। वे भाजपा रा उम्मीदवार अनवर कुरैशी ने हरायो। मुस्कान बानो ने 23 जद के अनवर कुरैशी ने 17 वोट मिल्या।

000

भारतीय रिजर्व बैंक रा 90 वां स्थापना दिवस रा सिलसिला मांय कोटपूतली-बहरोड़ ज़िला रा विराटनगर मांय आज वित्तीय कार्यक्रम राख्खी ज्यो। ई दौरान भारतीय रिजर्व बैंक अर गैर सरकारी संस्थान री ओर ऊं 2 कॉलेजां मांय प्रश्नोत्तरी होड राख्खी ज्यी। वित्तीय परामर्शक बतायो के कार्यक्रम मांय वित्तीय साक्षरता, साइबर दगाबाज़ी अर बैंक री न्यारी-न्यारी योजनावां रा बारा मांय विगतवार जाणकारी दीरीजी।

000

राजसमंद ज़िला मांय देवगढ़ रा पीएम श्री केन्द्रीय विद्यालय मांय आज लड़कियां ने गुड टच-बेड टच रा बारा मांय जाणकारी दीरीजी। ई दौरान टाबरियां ने वां सागे किण ई भांत री गलत हरकत व्हेवण परां वां री खिलाफत करण अर ई बारा मांय मायतां सागे खुल र बात करण री राय दीरीजी। टाबरियां ने चाइल्ड हैल्प लाइन नंबर 1098 रा बारा मांय ई जाणकारी दीरीजी।

000

केकड़ी मांय बुजुर्गा रा रहवास सारू सामाजिक न्याय अर अधिकारिता विभाग कानी ऊं चलाया जावण वाळा वृद्धाश्रम रो आज जिला कलेक्टर श्वेता चौहान उद्घाटन कीनो। समाज कल्याण अधिकारी इंद्रजीत सिंह बतायो के 25 बिस्तरां वाळा ई वृद्धाश्रम मांय जरूरतमंद बुजुर्गा सारू रहवास, खाण-पीण, ईलाज अर रोजीना री जरूरत रा सुबीता मुफ्त मुहैया करायी ज्या है। ई वृद्धाश्रम मांय देश भर ऊंआवण वाळा 55 साल ऊं बत्ती उम्र री महिलावां अर 60 साल ऊं बत्ती उम्र रा पुरुष रहवास कर सके है।

000

जैसलमेर रो ठावो बाबा रामदेव मेळो काल संवारे मंगला आरती सागे सरू व्हेला। ई सारू जिला प्रशासन अर मंदिर समिति री ओर ऊं जरूरी तैयारियां कर लीरीजी है। जातरूआं री हिफाजत सारू मोटी तादाद मांय पुलिस जाब्तो तैनात करी ज्यो है अर सी.सी. टी.वी. कैमरा लगायी ज्या है।

000